



大清穆宗繼天開運受中居正保大定功聖智誠孝信敏恭寬
毅皇帝實錄卷之二百六十二

同治八年己巳秋七月辛未朔日食○享

太廟遣醇郡王奕譞恭代行禮○

上詣綏履殿問

慈安皇太后安○平安室問

慈禧皇太后安○至己亥皆如之○諭軍機大臣等總理各國事
務衙門奏洋人在臺灣違禁滋事○現籌辦理情形一摺○洋人
美利士等在臺灣大南澳地方伐木墾荒○私販軍火○交通生
番○實屬違禁妄為○業經該衙門照會英布兩國使臣○由中國

自行拏辦。並知照該督撫酌覈辦理。此事英國使臣自知理屈。已據照覆。飭將英人名康撤回。而布國使臣則請將美利士暫行停辦。顯有袒護之意。此時該洋人等曾否撤回。抑仍在該處招募工作。如果不遵條約。任性妄為。自應由該督撫查拏懲辦。惟事關中外交涉。必須有明幹大員。隨時斟酌辦理。方臻妥協。臺灣道一缺。關係緊要。未便久懸。著英桂卞寶第迅速揀員奏補。或先擇人署理。責成將洋人交涉事件。察看情形。妥慎籌辦。總期不激不隨。毋稍偏倚。原摺著鈔給閱看。將此由四百里各諭令知之。○又諭棍噶扎勒參奏叛民中變。勢難開導。一摺。據稱叛民近蹋哈薩克遊牧。與俄羅斯

守卡之兵接仗。傷有一二十人。並與布倫托海大臣偽篆印文一件。不知內係何詞等語。該叛民兇心未改。復與俄夷生事。傷其守卡兵丁。恐開邊釁。福濟文碩錫綸。惟當凜遵前旨。相機妥籌辦法。毋稍大意。棍噶扎勒參以該叛民言詞狂妄。未能開導。現在紮營克林河。分其再竄之勢。未敢擅行進剿。著福濟等體察情形。知照該呼圖克圖遵辦。其偽篆印文。是否即係前此所遞呈詞。並著文碩錫綸查明具奏。棍噶扎勒參另片奏。叛民與俄兵接仗各情。據逃出民人阿勒太聲稱。在內目覩。此事既屬確實。福濟等不得遷就因循。致生枝節。原摺片均著鈔給閱看。將此由五百里各諭令知之。○壬申。

諭軍機大臣等。英桂。卞寶第奏。請簡臺灣道員缺。並請以楊在元試署臺灣鎮總兵各摺片。本日已降旨。令黎兆棠署臺灣道員缺。並批令楊在元試署臺灣鎮矣。臺灣孤懸海外。五方雜處。人心浮動。當此多事之秋。必其人才識足以獨當一面。而又能實心整頓者。方能有益地方。著英桂。卞寶第。於該鎮道到任後。留心察看。如措置未能合宜。卽行奏明撤回。斷不可因保奏在前。稍涉迴護。儻該督等有心徇隱。致誤地方。必惟英桂等是問。將此由四百里各諭令知之。○又諭。文煜等奏。洋務日繁。請調員來閩差遣。英桂奏。請飭江蘇撥還閩硝各摺片。閩省福州口洋務日繁。必須添員辦理。方臻妥協。

前福州府知府丁嘉瑋。福建儘先補用參將王榮和。旣據該將軍等奏稱。該員等熟悉洋情。自應俯如所請。丁嘉瑋籍隸順天府大興縣。著萬青藜。王榕吉。飭令該員迅速赴閩。王榮和一員。前經丁日昌調赴江蘇。業由英桂檄調。仍著丁日昌。卽飭該參將。剋日前往。以資差遣。英桂奏閩省需用硝斤。向在山東採辦。咸豐七年間。委員韋濂等在東省運辦硝斤。行過江蘇。先經喬松年截留五萬斤。又經王有齡前後截留十萬斤。共計十五萬斤。至今尚未撥解還閩。現在閩省各營操練兵丁。趕製火藥。需硝甚鉅。著丁日昌按照前次截留數目。趕緊撥還。派員押運赴閩兌收。以濟要需。將此諭知萬青藜。

王榕吉。並由四百里諭令丁日昌知之。○癸酉。諭內閣。御史宋邦德奏。請飭各省籌補常平倉穀等語。常平倉為積儲良策。自軍興以來。各省倉穀。率多空虛。亟應及早籌補。以備災歉。著各直省督撫。督飭該管道府。按屬查報。應如何籌款分年買補。並嚴杜州縣侵那之處。卽行妥籌辦理。○又諭。吳坤修奏。各屬被水災黎。先行籌款撫恤等語。安徽懷甯等十六州縣。本年夏間雨水過多。江湖泛漲。漂沒田廬。小民困苦。顛連殊堪矜憫。現經該署撫籌銀三萬兩。分交安廬徽甯兩道。督屬分別撫恤。卽著飭令該管各地方官躬親督率。妥為經理。毋任吏胥侵蝕。並著該署撫親赴沿江各屬。實力稽查。以

杜弊端。目下節屆秋令。該地方農田能否補種。仍著察看情形。隨時具奏。○諭軍機大臣等。前據丁寶楨奏。鼎軍在韓莊地方搶掠。當經諭令丁寶楨嚴拏懲辦。一面督飭出境。並諭馬新貽等。添派文武彈壓回皖。茲據張之萬奏稱。該軍已抵宿遷。檄飭姚廣武等帶兵前往彈壓。並分飭各軍嚴防滋擾。卽著張之萬傳旨。令其分起回皖。並飭徐海道高梯迅給餉銀。免致藉口。馬新貽所派員弁。計可趕到。並著會同彈壓。俾遵約束。安徽現患水災。各處土匪游勇。本不安靜。而遣撤各軍踵至。此輩無所營生。深恐為害地方。著李鴻章。英翰。吳坤修。仍遵前旨。飭令潘鼎新。妥為安置。固不可操之太蹙。亦不

可任其橫行。英翰等責任地方。尤當悉心籌商。務臻妥協。毋任滋生事端。前據劉典奏。已革提督劉效忠。因牲畜細故。砍斃馬夫王麻子。因降旨令解回山東原籍。交地方官嚴加管束。第恐該革員素性暴戾。與鄉里未能和協。復萌故態。著丁寶楨於劉效忠解到時。隨時留心。如仍不安分。卽著設法辦理。毋稍姑息。劉典片。著鈔給丁寶楨閱看。將此由五百里諭知李鴻章。馬新貽。張之萬。丁寶楨。英翰。並傳諭吳坤修知之。

○又諭。定安。桂成。奏。回股復犯草地。官軍勦截獲勝。並請撥兵駐紮甯夏平羅一帶各摺片。阿拉善旗之定遠營。被回逆圍困甚急。張曜會同烏爾圖那遜帶兵往援。由蘭扇至察漢。

淖爾地方。遇賊接仗。擊斃悍賊甚多。紅柳樹一帶伏賊。亦經官軍擊敗。其塔爾貝都貢地方。回股復為烏爾圖那遜所部衝散。該逆等仍由舊路。連夜西遁。此次逆回糾合東竄。疊經官軍擊敗。勦辦尚為得手。卽著該將軍等。迅飭張曜各軍。乘此聲威。覘賊所向。會合勦除。以期痛殲醜類。所有在事出力將弁兵勇。著准其擇尤彙案請獎。現在蒙漢各民。避居北山。該處直達包薩。難保該逆不因邊內乏糧。復行窺伺。金順一軍。前擬由烏喇西進。該軍現已渡黃。暫紮什巴爾台。著仍遵疊次諭旨。酌度情形。與張曜等聯絡聲勢。分投堵勦。定安等以左宗棠大軍。進勦靈州賊匪。若鋌走草地。張曜等追勦較。

遠請飭金順駐軍於甯夏平羅一帶。或由左宗棠另撥一軍。聯絡扼紮。遏賊東竄北竄之路。所籌不為無見。金順追賊正緊。所部亦不甚厚。應否駐軍甯夏平羅。著會同定安等悉心商推。以免顧此失彼。如金順實難兼顧。即著左宗棠另撥一軍。往彼駐紮。肅清餘匪。即可專意西征。該大臣不得以無軍可撥。致賊遂其乘虛之計。牽掣我師。刻下陝甘各回。未必不意圖勾結。穆圖善務當督飭將士。將河狄各匪痛加勦洗。以斷賊援。並隨時與左宗棠、金順等彼此熟商。俾諸軍聲息相通。迅珍羣醜。杜嘎爾、富勒琿等現抵何處。仍著定安等隨時知照該副都統等會合追勦。用壯聲威。將此由六百里各諭。

令知之。○以故喀喇沁扎薩克頭等塔布囊德勒格爾子阿玉爾扎那襲職。○甲戌諭軍機大臣等。曾國藩奏永定河漫口未能合龍等語。永定河北四下汎漫。口經道員徐繼鏞堵築。本已定期合龍。因雨大溜急。不能搶辦。固係實在情形。惟口門本不甚寬。引河大壩均尚如故。仍當隨時酌度情形。妥籌辦法。著曾國藩飭令該道認真經理。一遇水勢稍殺。即當趕緊堵合。毋任泛濫為災。至全河受病日深。宣洩不暢。隄埝單薄。他處易有決溢之虞。曾國藩既慮及此。將來合龍後。自應將中洪下口挑挖疏濬。以資補救。毋得稍涉大意。將此諭令知之。○又諭劉嶽昭奏分兵赴省會勦。並援救普安廳城。

岑毓英奏。收復嵩明州城。及各路軍務得手情形。暨軍功李鳳祥等勦賊出力各摺片。滇省賊匪。急則求撫。緩則悖叛。已成慣技。岑毓英於此次收復嵩明州城後。將詐降逆首李芳園。卽行殲除。並將匪黨晏洪等悉予誅戮。辦理尚合機宜。此時祿豐羅次之軍。次第得手。白鹽井又經攻克。聲威已壯。卽著岑毓英督飭各軍。乘勝進勦。迅速攻取祿豐安甯易門昆陽等處。以期速解省圍。所有收復嵩明州城及攻克白鹽井等處出力員弁。著准其俟省圍解後。彙案奏請獎勵。軍功李鳳祥。劉光瓊。李珍國等。於迤西各城全失之際。乃能固守巖阿。現又攻克龍陵廳。實屬深明大義。著岑毓英查明奏請優

獎。劉嶽昭現派總兵李家福等各率所部。由曲靖赴省。卽著飭令趕緊前進。知照省垣各軍兩面夾擊。迅奏肅清。至貴州普安城。近接滇疆。現在苗匪巖大五一股。圍撲廳城。該督派兵援救。並飭知州文鴻盛嚴扼滇防。杜其竄越。東路自可無虞。著於布置稍定。卽赴省城。與岑毓英和衷共濟。會籌全局。早靖巖疆。將此由六百里各諭令知之。○以貴州大定等處攻克苗巢出力。賞道員沈壽榕一品封典。總兵官楊正高。劉節高。副將王維金。都司吳奇忠。巴圖魯名號。同知陳席珍。都司劉奇義等花翎。知縣楊作霖等藍翎。餘加銜升敘有差。○予雲南尋甸陣亡遊擊馬祥麟等祭葬世職加等。○旌表守

實錄卷二百六十三
正捐軀安徽太和縣民女李討娼民婦張段氏○乙亥諭內閣溥霖等奏知縣拖延欠餉請飭查察一摺直隸豐潤縣應解

孝陵

孝東陵禮部內務府本年春夏二季餉銀米折及上年夏季八旗兵餉屢經溥霖等行催守提該縣知縣彭載恩任意延宕實屬玩誤著直隸總督飭令藩司查明該縣應解餉銀是否已領未解抑或具領遲延卽行據實嚴參尋曾國藩奏遵查豐潤縣應解禮部內務府俸餉等銀具領後值夏雨時行道路泥淖致稽時日應解八旗餉銀實因司庫支絀撥給稍遲

均非無故延宕請免參辦從之○又諭前據左宗棠奏河東鹽務廢弛解款積壓並河東道李慶翱鄙詐成性惟解鑽營等情當經諭令鄭敦謹查明具奏茲據奏稱河東鹽課向係陸續徵收必至次年奏銷時始能全完故歷屆撥解甘餉均在次年奏銷後解清並非李慶翱任內有意積壓道庫存款五十一萬餘兩雖與左宗棠原奏相符然已借動一半且有勻撥京餉等款實存並無此數是以甘餉未能立即解清至鹽引積滯則因襄樊以北淮鹽侵占並陝豫引地銷售不暢之故李慶翱居官勤慎現署臬篆於公事均能講求實無夸詐習氣等語署山西按察使河東道李慶翱既據鄭敦謹查

明並無廢弛鑽營情事。若無庸議。○陝西巡撫劉典奏請調安徽道員易潤壇赴營差委。允之。○以驗收海運漕糧完竣。予倉場侍郎延煦。畢道遠議敘。員外郎廷彥等加銜升敘有差。○以行止卑污。革山東知縣楊鐸職。永不敘用。○緩徵山西吉州被擾歉收地方民借倉穀。○丙子。諭軍機大臣等。福濟。錦丕勒。多爾濟奏。西兩盟願領厄魯特人眾一摺。厄魯特人眾。除察哈爾。哈薩古特。兩蘇木擇地安插外。所贖六千有餘。尚無分安之處。經福濟等札調扎薩克圖汗賽因諾顏。諸盟長赴烏面議。該王公等現已遞呈願領。擬將所贖人數。平分五起。以一起留杜爾伯特。其四起按計各佐領均分。辦理

甚屬妥協。即著福濟等傳知各該王公等。於該人眾到旗後。妥為約束。使之日久相安。惟該人眾分赴各旗。沿途未免擁擠。著文碩。錫綸。先將應分三千餘人。按照杜爾伯特。及扎薩克圖汗賽因諾顏。佐領多寡。均攤勻散。造具名冊。交該管官帶領陸續起程。俾臻安速。並豫將所贖一半名冊編齊。俟庫倫咨到時。再行分遣。庫倫之東兩盟。所領人數無幾。且見西兩盟如此辦理。諒亦不以為難。張廷岳等務須勸諭得宜。迅咨文碩等將該人眾領到。按數分安。俾此事早得就緒。另片奏。棍噶扎勒參經過摺報。請隨時斟酌重輕。附摺便一併轉遞等語。嗣後該呼圖克圖所發摺報。如非緊要事件。著福濟

等仍遵前旨。卽行截留。附報呈遞。以符體制。將此由五百里各諭令知之。○予故河南按察使余炳燾入祀名宦祠。從巡撫瑛榮請也。○丁丑。以上年直隸等省蕩平捻逆出力。賞提督劉玉龍。丁文學。張國英。龔生陽。袁發。吳廷瀛。總兵官李勝。呂金榮。孔慶玉。一品封典。總兵官王孝祺。張樹勳。孫文科。成呈清。吳春和。梁朝爽。吳長璐。徐得貴。陶崇文。丁大文。李敏修。副將馬道南。劉奎榮。李鳳翔。屈聖祥。王樹楠。萬觀貞。曹雲芬。朱得勝。李宏蟾。劉啟發。張志鼈。唐安邦。鮮椿山。陳皋。楊春貴。丁貞創。林成興。協領聶車布。參領雙福。恩祥。依楞額。參將劉天長。王龍標。武韶剛。李鶴山。姚德雲。陳儀生。徐步發。周元春。

李加典。林鵬。李吉祥。尹山雲。喻少還。尚啟瑞。遊擊梅從吉。朱復才。張元勝。王來清。曾鳳翔。劉詩藻。徐連陟。李佑增。傅鴻。張海洋。佐領綳楚克。雜克巴。都司楊毅成。盧金良。何承貴。樂達發。衛守備劉步周。馬樹林。陳丙福。羅鳳翔。劉麟厚。彭安吉。夏輝銀。張正有。巴圖魯名號。知府劉樹棠。副將桂林香等花翎。筆帖式常緒等藍翎。餘加銜升敘有差。○予貴州靛山殉難知縣湯澤長等祭葬世職加等。○予貴州軍營病故總兵官黃清源祭葬卹廕。○予貴州各屬陣亡殉難紳民林秀東等暨婦女二千七百九十七名口分別旌卹如例。○戊寅。諭軍機大臣等。左宗棠奏。進勦甘肅南路竄回獲勝。並進駐涇州。

籌辦軍務各一摺。河州逆回自成縣竄陷兩當。經李輝武等進勦。收復縣城。並將清水縣唐藏回匪擊敗。吳士邁一軍復將秦安康坪堡回巢攻破。勦辦尚屬得手。所有此次尤為出力員弁勇丁。著准其擇尤彙案保奏。陝回散布黑城子預望同心各堡。互相猜疑。甘回亦畏懼求撫。惟回情狡詐。反覆無常。左宗棠務當酌度情形。分別勦撫。以期一勞永逸。劉松山一軍。到花馬池後。即飭相機前進。毋稍延緩。郭寶昌軍現紮何處。應否與劉松山合隊西行。以資厚集。著該大臣酌量調遣。毋置諸無用之地。董志原竄回。紛擾邊外。及阿拉善旗境。著遵奉疊次諭旨。派兵兜勦。並飭雷正綰。黃鼎兩軍。迅由平

涼固原。合勦北路逆回。兼為南路聲援。左宗棠現已行抵涇州。著穆圖善即遵前旨。將關防派員送交左宗棠接收。前經諭令左宗棠接篆後。或前赴秦州一帶。擇要駐紮。本日左宗棠亦奏稱甘肅餉源。恃秦州一綫轉輸。河州逆回。專以斷官軍餉道為主。是秦州關繫尤為緊要。該大臣駐軍涇州。恐尚不足以資控制。著仍遵前旨。酌量移軍。總期力保完善。兼衛省垣。不得顧此失彼。甘省餉絀營多。左宗棠接篆後。即當妥為籌畫。竭力整頓。務使兵歸實用。餉不虛糜。以維大局。將此由六百里各諭令知之。○己卯。

孝靜成皇后忌辰。遣官祭。

慕東陵○庚辰

孝懿仁皇后忌辰遣官祭

景陵○以翰林院編修盧士杰為陝西鄉試正考官○刑部員外郎周瑞清為副考官○補行同治七年大計○東河卓異官二員○有疾官一員○分別議敘處分如例○辛巳

上奉

慈安皇太后

慈禧皇太后幸漱芳齋侍午膳○諭軍機大臣等○穆圖善奏甘省地方情形及回逆竄擾阿拉善旗地請撥兵援剿定安奏回逆圍攻定遠營派兵進援各摺片甘省逆回北路則由甯

靈竄出邊外莫得掠食南路則肆擾秦州圖絕官軍進糧之路其計甚為兇狡惟劉松山向花馬池進發截剿甯靈竄匪而秦州為轉輸要道關係非輕著左宗棠仍遵疊次諭旨移軍進駐秦州接受督篆以期力扼要區兼衛蘭州省垣不得以屯田為詞株守一隅穆圖善即遵前旨派員將總督關防送交左宗棠接受以專責成左宗棠身為統帥兼任封圻接篆以後軍務及地方各事宜俱屬責無旁貸著即悉心經理妥為布置如有疏虞惟該大臣是問穆圖善交卸督篆著仍以將軍督率在省兵勇力圖保衛其河州股匪仍當隨時撥兵堵剿該將軍所部兵勇若干糧餉應用若干即咨明左宗

崇應如何布置裁併之處。卽由該大臣妥籌辦理。左宗棠、穆圖善同辦一事。務當和衷商酌。以顧大局。不得各存意見。逆回竄擾阿拉善旗地方。該親王祖瑩府第均被焚毀。前據理藩院奏聞。諭令定安等撥兵籌勦。現在定遠營尚未解圍。定安飭令楊春祥帶隊進勦。兵力尚單。金順行抵達拉特旗什巴爾台地方。著酌量情形。仍遵前旨。或撥兵協勦。或直抵平羅。卽與定安商酌勦辦。張曜現在進駐纏金沙金托海。其後隊到齊後。仍著定安催令前進。立解重圍。本日據李鶴年奏。宋慶患病。請給假兩月調理。該軍事務委提督蔣東才劉廷照料。已批令在營調理。蔣東才等能否得力。並著定安隨時

察看。妥為兼顧。定安所錄回匪王登明供詞。察其情形。與左宗棠等歷次所奏回逆求撫各情相符。著鈔給該大臣閱看。斟酌辦理。將此由六百里各諭令知之。○以紫禁城接班遲延。散秩大臣恩齡下部議處。○以綏遠城沙金托海等處勦匪出力。予營總世祿以副都統簡放。賞佐領銜驍騎校文瑞花翎。把總李得勝等藍翎。餘升敘有差。○壬午。慈安皇太后聖壽節。遣官祭

太廟後殿。

奉先殿。

上率王以下文武大臣詣

慈寧門行慶賀禮。眾官於午門外行禮。○詣綏履殿

慈安皇太后前。侍早膳。○奉

慈安皇太后

慈禧皇太后幸漱芳齋。侍午膳。○以古城十里長灘等處擊退回匪出力。賞副都統富魁。托克屯。佐領富春。一品封典。總兵官汪德才。委參領亮山。遊擊丁吉炳。羅得勝。王玉山。副護軍參領松林。佐領塔爾通阿。保林。都司王明海。黃輝廷。守備王得標。程朝立。李大洪。防禦趙際。驍騎校郭爾吉扎。千總方春發。陳義興。巴圖魯名號。都司江有成等花翎。縣丞嚴書鴻等藍翎。餘加銜升敘有差。○癸未。

上奉

慈安皇太后

慈禧皇太后幸漱芳齋。侍午膳。○甲申。諭軍機大臣等。蘇鳳文。馮子材奏。官軍克復越南九蒞等屯。埽平賊壘。現督軍進勦一摺。逆匪吳亞終。率黨竄入越南。蔓延通攜文淵洛陽等處。經該撫等飭令總兵謝繼貴統帶所部。會合副將劉玉成等分投進勦。殲賊甚多。並將賊壘燒毀二十餘座。克復通攜。謝繼貴遂取道高村等處。進規木馬。副將吳天興一軍。由板錫乘勝前進。攻克板在村。其文淵匪眾。又經都司陳朝綱持平。賊黨由驅贏來援者。官軍約同降勇夷兵渡河夾攻。賊勢披

廉○餘匪奪路而逸○該逆復下竄龍州○馮子材令劉玉成等軍
取道彬橋○疊奪賊壘○由那錦橫坡等處分路圍攻○將九葑洛
陽各屯次第克復○該匪退守木馬○蘇鳳文等現以賊勢漸蹙○
督軍進攻○並剴諒平各路夷官○堵截潰匪○著即督飭劉玉成
等馳往木馬等處○迅速分攻○毋任該逆得以喘息○吳亞終於
窮敗之餘○竄走越南邊地○何難一鼓蕩平○乃臨以全省兵力○
經年累月○尚未蕙功○實屬不成事體○現在進勦各軍○該撫等
責成何人辦理○其得力員弁○係屬何人○難免無聞葺畏蕙之
人○濫廁行列○均著逐一查明○據實具奏○蘇鳳文等務當振刷
精神○力除積習○迅將此股賊匪盡數殲滅○綏靖藩封○毋得觀

望遷延致干咎戾○道員李均前有人奏參把持軍需侵蝕公
項各款○當交蘇鳳文按照所參○確查覆奏○茲據該撫奏稱李
均在途患病○委員接護越南陪臣回粵等語○該道員被參各
節○仍著該撫遵奉前旨○徹底查辦○不准稍涉含糊○並著催令
該員趕緊回粵○毋許託病逗遛○將此由五百里各諭令知之○
○予廣西龍州等處陣亡參將鄭魚○守備謝福昌○祭葬世職
加等○乙酉○中元節○

上詣

奉先殿

壽皇殿行禮○遣官祭

永陵○

福陵○

昭陵○

昭西陵○

孝陵○

孝東陵○

景陵○

泰陵○

泰東陵○

裕陵○

昌陵○

昌西陵○

慕陵○

慕東陵○

定陵○遣官祭

端慧皇太子園寢○諭軍機大臣等錫綸奏擬買糧賑恤厄魯特人眾並擊敗變民各摺片厄魯特人眾散處阿勒台烏梁海上爾扈特扎哈沁等部落者已數千人其流寓科城附近地方亦百餘家近因迫於飢寒肆行劫盜與各部落已有仇隙錫綸擬在科城採買糧石散放賑濟自係權宜之計即

著照所請。將部撥餉銀提用三千兩。就近在科城採買口糧數百石。以資賑濟。該人眾流離失業。情亦可憫。文碩錫綸務須妥為撫恤。儻餉銀有不足之處。仍准其隨時請撥。福濟所辦喀爾喀分安各事宜。已有成效。文碩錫綸即按照該將軍等所擬分安人數。按名散放口糧。一面收集。一面即分撥各該地方安插。以期早弭釁端。此時庫倫東兩盟分領人數文冊。已否咨到。著福濟榮全。錦丕勒多爾濟。文碩錫綸迅速咨商辦理。毋稍延緩。棍噶扎勒參帶兵赴霍博克賽里地方。適變民張懇率眾西擾。經該呼圖克圖會合該處蒙兵攻擊。斬獲甚多。張懇中傷逃遁。著福濟等仍遵前旨。相機籌畫。傳知

該呼圖克圖遵照辦理。將此由五百里各諭令知之。

大清穆宗繼天開運受中居正保大定功聖智誠孝信敏恭寬
毅皇帝實錄卷之二百六十二

